

Na Colegio Arubano

Ex-Astronauta sorprende cu T-shirt “I am an Astronaut of Earth”

Desde su yegada na Aruba, ex-Astronauta Profesor Wubbo Ockels, riba peticion di Gabinete Mike Eman, a bin ta participa den diferente charla na scolnan secundario di Aruba, riba e tema di sostenibilidad. Semper e intencion tras di e charlanan aki ta con un y tur, cuminsando cu nos hobennan, por percura pa un miho futuro pa nan pais. Gobierno di Aruba ta hibando un maneho cu ta promove un miho calidad di bida, pero principalmente logra cu e pais aki ta of casi

100% liber di fossiel fuel pa 2020. Esaki por wordo logra cu e generacion hoben di Aruba. Profesor Ockels, kende a traha riba diferente proyecto den e ramo aki, incluyendo boto, auto y un superbuss “berde”, den su discurso na hobennan di Colegio Arubano Playa ayera tabata pa “semper hinca tur bo esfuerso den loke bo ta bon den dje y laga e resto un banda” y corda cu ta un planeta manera mundo so tin. “Nos tur ta Astronauta di Planeta Mundo”. Na momento cu el a caba di

expresa e palabranan aki, un grupo di studiantenan di V-5 a cuminsa lansa grito di apoyo y a cana bini dilanti cu un regalo pa Profesor Ockels.

E ta un T-shirt cu dilanti ta bisa “Mi Compromiso cu Aruba” y parti patras tin e lema di Ockels “I am an Astronaut of the Earth”, cual, manera Ockels a bisa, tabata “un sorpresa agradabel” cu e no a spera.

Profesor Ockels a tene su charla na diferente scol di Aruba, pa casi dos mil hoben caba desde su yegada. E charlanan hunto



cu Dr. Ockels ta un iniciativa di BoBario cu tin como meta conscientisacion di henter pueblo di Aruba, pero particularmente

hobennan, di e importancia di uzo consciente di energia den tur su aspectonan.